

ساعى البريد

أنا عارفه أن كلنا بنعمل خير وبندى ناس حوالينا حاجات
بيكونوا محتاجينها ، أو فلوس بس مش كتير مننا يعرف ان
مش بس يدى ، لا ، لازم ينوى من جوه قلبه انه بيدى
الخير مش بس فلوس ،

الخير جبر خاطر ، ضحكة ، كلمة طيبة ، وقوفنا جنب حد
محتاج لنا ...

عمر ك فكرت ان ربنا بياخد منك قرض ... آه ...

ربنا بيقول (من يقرض الله قرضاً حسناً).

ايه رأيك ... ان ربنا كمان بيرد لك القرض ده أضعاف
مضاعفة

- من أجمل الحاجات اللى ممكن نحس بها هي اننا
بنعمل حاجة لحد نقدر نبسطه بها حتى لو بسيطة بس
بنعمل له اللى فى وسعنا .

ساعات كثير بنفكر ان اللي بنعمله لناس حوالينا هو فضل
مننا مانعرفش انه واجب علينا...

• الرسول (ص) وصانا بكده وقال اننا من حقوقنا على
بعض اننا نقف جنب بعض فى النصيحة والفعل وحتى
لما بنموت وصانا اننا نمشى فى جنازات بعض.

* ايه رأيك لو اتعلمت الدفا حواليك !!! ..

دفى قلوب الناس

اللى يعرفك واللى مايعرفكش

أجبر خاطر أى حد ... حسسه باهتمام ... ادى الناس من
غير ما تحسب هاتأخذ ايه ... انت هتأخذ بس من ربنا ...

عارف لما بتزور مريض بيكون فى سبعين ألف ملك
بيستغفروا لك.

• عمرك فكرت انك تأخذ فرحتك من فرحة اللى حواليك
أول ما بتقرر انك عايز تخلى اللى قدامك سعيد جسمك
بيكون فى حالة سعادة ومنتعة ...

• جرب مرة تكون متضايق وتقرر بدل ما تفضل تلوم نفسك والظروف تنزل تعمل حاجة لحد تجبر بيها خاطر حد وتسعده ... هاتلاقى نفسك بقيت مبسوط ومرتاح ...

فى مثل بيقولوه (اعمل الخير وارميه البحر) انت بقى مش بترميه البحر انت بتحطه فى حضن ربنا

جرب تتصدق من غير ما تحسب هایتبقى فيه كام باقى معاك وتقعّد تسأل نفسك هاكمّل الشهر ازای ... جرب كده هتلاقى ربك بارك قوى فى اللى فضل معاك ...

• فاکر لما ربنا بعثك فلوس وسترك بها فى موقف معين كنت محتاجها فعلاً ... من غير ما تعرف جت ازای ... تحط ايدك فى جيبك تلاقى فلوس وتكون مستغرب ... ده كرم ربنا مش هو قال

(انفق انفق عليك).

احنا زى ساعى البريد بنشيل حاجات لناس تانية ... ربنا بيوصلك حقك زى ما بتوصل حقوق الناس - خلي جواك صفات من أسامى ربنا.

العطاء والكرم من صفاته تفكر انت هاتقف جنب عبد من
عباده وهو هايسيبك لوحدك.

أنا عارفه انك هاييجى فى بالك كام حد وقفت جنبه وهو
ماسألش عنك ، ماتعدش خلى جواك نية انك بتعمل لرضا
ربنا عليك ...

ادى من غير ما تفكر هاتاخد ايه ... من غير ما تحسب ولا
تبص للناس هاتقول ايه ...

للاسف الناس وصلت انها لما تشوف حد بيهتم وبيقف جنب
حد تستغرب أو تفهم الاهتمام بشكل غلط ... ماتقلقش أنت
مش غلط

خلى قدوتك أخلاق الرسول وأسامى ربنا خليك رحمة منه فى
الأرض ...

ماتحرمش نفسك من متعة العطاء وجبر خاطر الناس ...
خلى نيتك دايماً خير وطلع حب وفلوس وأكل وابتسامه
ووقوف جنب الناس.

- اعمل اللى تحب فى يوم يتعمل لك ... لما تيجى تطلع حاجة طلعتها حلوه مش قديمة ومستهلكة ... لو بتأكل أكلة وعارف أن فى حد محتاج مش هايقدر يجيبها اديها له ماتخافش انت كده بتوديتها لحضن ربنا ...

(لن تنالوا البر حتى تنفقوا مما تحبون)

- احساسك بالعطاء بيعود عليك بحاجات كتير فى حياتك حلوه ... هاتدى نفسك طاقة إيجابية وطاقة حب لأن الطاقات الإيجابية بتاخذ اللى زيها ...

- الحب بيوجب حب .. والعطاء هاىخلى نعم ربنا تهل عليك من كل حته ...

- ادى ماتخفش فلوسك مش هاتخلصك ... حبك هيكبر ... قلبك هايسكنه الرحمه ... هاتأخذ ستر من ربك ...

- العطاء ده مغايطس هايجيب لك كل الخير والنعم ...

- بس انت أنوى تفرح هتفرح ...

• سكن النية فى قلبك انك ناوى تسعد اللى حواليك بكل
ما تملك من قوة هاتحس بسعادة تفوق خيالك.

كلنا محتاجين بعض ... واللى بتعمله لحد هايرجع لك من
شخص تانى شوف انت محتاج ايه يرجع لك ...

وافتكر إنك ساعى بريد بيوصل رحمة ربنا على الأرض